

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренцијски савјет

RJEŠENJE

**po Prijavi namjere koncentracije između privrednog subjekta DELTA DMD d.o.o.
Beograd, Republika Srbija i privrednog subjekta DARTA TRGOVINA d.o.o. Banja
Luka, Bosna i Hercegovina**

**Sarajevo
Oktobar, 2008. godine**



Broj: 01-02-26-029-11-II/08
Sarajevo, 22.10.2008. godine

Na osnovu člana 25. stav (1) tačka e), člana 42. stav (1) tačka d), a u skladu s čl. 12., 14., 16. i 18. Zakona o konkurenciji („Službeni glasnik BiH“, br. 48/05 i 76/07), rješavajući po Prijavi namjere koncentracije između privrednog subjekta DELTA DMD d.o.o. Beograd, Žorža Klemanosa 37, 11000 Beograd, Republika Srbija, zastupanog po punomoćniku Dušan Klještan, Beograd, Republika Srbija i privrednog subjekta DARTA TRGOVINA d.o.o. Banja Luka, Knjaza Miloša bb, 78000 Banja Luka, Bosna i Hercegovina, zaprimljenoj dana 18.07.2008. godine pod brojem 01-02-26-029-II/08, Konkurencijsko vijeće na 74. (sedamdesetčetvrtoj) sjednici, održanoj dana 22.10.2008. godine, je donijelo

R J E Š E N J E

1. Ocjenjuje se dopuštenom koncentracija koja će nastati na tržištu trgovine na veliko robom široke potrošnje, kao i na tržištu izdavačko, novinsko i štamparske djelatnosti u Bosni i Hercegovini sticanjem kontrole kupovinom većinskog vlasničkog udjela u privrednom subjektu DARTA TRGOVINA d.o.o. Banja Luka, Knjaza Miloša bb, 78000 Banja Luka, Bosna i Hercegovina, od strane privrednog subjekta DELTA DMD d.o.o. Beograd, Žorža Klemanosa 37, 11000 Beograd, Republika Srbija.
2. Izriče se novčana kazna privrednom subjektu DELTA DMD d.o.o. Beograd, Žorža Klemanosa 37, Beograd, Republika Srbija, radi povrede odredbi člana 49. stav (1) tačke a) i c) Zakona o konkurenciji koje se odnose na dostavljanje netačnih ili pogrešnih informacija u postupku ocjene koncentracije u visini od 20.000,00 KM, koju je dužan platiti u roku od 8 dana od dana prijema ovog Rješenja.
3. Ovo Rješenje o koncentraciji upisuje se u Registar koncentracija.
4. Ovo Rješenje je konačno i bit će objavljeno u „Službenom glasniku BiH“, službenim glanicima entiteta i Brčko Distrikta Bosne i Hercegovine

O B R A Z L O Ž E N J E

Konkurencijsko vijeće je zaprimilo, dana 18.07.2008. godine, Prijavu namjere koncentracije (u daljem tekstu: Prijava) pod brojem 01-02-26-029-II/08 od strane privrednog subjekta DELTA DMD d.o.o. Beograd, Žorža Klemanosa 37, 11000 Beograd, Republika Srbija (u daljem tekstu: DELTA DMD ili Podnosilac prijave), podnesenu od strane punomoćnika Dušan Klještan, 11000 Beograd, Republika Srbija (JMBG: (..)*¹), kojom namjerava steći 10,0% udjela u privrednom subjektu DARTA TRGOVINA d.o.o. Banja Luka, Knjaza Miloša bb, 78000 Banja Luka, Bosna i Hercegovina (u daljem tekstu: DARTA TRGOVINA), a nakon dopuštenja koncentracije od strane Konkurencijskog vijeća koristiti *call* opciju s namjerom sticanja većinske kontrole u privrednom subjektu DARTA TRGOVINA.

¹ (..)* podaci se smatraju poslovnom tajnom u smislu člana 38. Zakona o konkurenciji

Nakon uvida u dostavljenu Prijavu Konkurencijsko vijeće je utvrdilo da je ista potpuna, te je u smislu člana 30. stav (3) Zakona o konkurenciji (u daljem tekstu: Zakon), Podnosiocu prijave izdalo Potvrdu o prijemu kompletne i uredne Prijave (u daljem tekstu: Potvrda), dana 01.09.2008. godine pod brojem 01-02-26-029-1-II/08.

Konkurencijsko vijeće je analizom podataka dostavljenih u prijavi i prikupljenih podataka od nadležnih institucija došlo do novih saznanja o učesnicima koncentracije i relevantnom tržištu, te je od Podnosioca prijave zatražilo dodatne informacije dana 08.09.2008. godine dopisom broj: 01-02-26-029-3-II/08, dana 26.09.2008. godine dopisom broj 01-02-26-029-6-II/08 i dana 14.10.2008. godine dopisom broj: 01-02-26-029-8-II/08.

Podnosilac prijave je tražene podatke dostavio dana 19.09.2008. godine dopisom broj 01-02-26-029-4-II/08, dana 22.09.2008. godine dopisom broj: 01-02-26-029-5-II/08, dana 30.09.2008. godine dopisom broj: 01-02-26-029-7-II/08, dana 16.10.2008. godine dopisom broj: 01-02-26-029-9-II/08 i dana 17.10.2008. godine dopisom broj: 01-02-26-029-10-II/08.

Podnosilac prijave je naveo da nema obavezu podnijeti zahtjev za ocjenu koncentracije nekom drugom tijelu izvan teritorije Bosne i Hercegovine, u smislu člana 30. stav (2) Zakona.

Konkurencijsko vijeće u postupku ocjene dopuštenosti predmetne koncentracije je utvrdilo sljedeće činjenice:

Prijava namjere koncentracije je podnesena u zakonom propisanom roku, u smislu člana 16. stav (1) Zakona.

1. Učesnici koncentracije

Učesnici koncentracije su privredni subjekt DELTA DMD d.o.o. Beograd, Žorža Klemanosa 37, 11000 Beograd, Republika Srbija i privredni subjekt „DARTA TRGOVINA“ d.o.o., Knjaza Miloša bb, 78000 Banja Luka, Bosna i Hercegovina.

1.1. Privredni subjekt DELTA DMD

Privredni subjekt DELTA DMD d.o.o. Beograd, Žorža Klemanosa 37, 11000 Beograd, Republika Srbija, registrovan je u Registru privrednih subjekata Trgovinskog suda u Beogradu, registarski broj 250497 (matični broj 20236426), dana 26.12.2006. godine.

Registrovana djelatnost privrednog subjekta DELTA DMD je trgovina na veliko parfimerijskim i kozmetičkim proizvodima, trgovina na veliko robom široke potrošnje itd.

Privredni subjekt *Hemslade Trading Limited*, Arch. Makariou III, 66, Kronos Court, 1. sprat, kancelarija 12, Nikozija, Republika Kipar, registrovan u Registru privrednih društava Ministarstva trgovine i usluga Republike Kipar pod brojem HE 43226, dana 13.03.1999. godine, je (..)* vlasnik privrednog subjekta DELTA DMD.

Privredni subjekt DELTA DMD nema povezanih privrednih subjekata na tržištu u Bosni i Hercegovini, ali njegov većinski vlasnik, privredni subjekt *Hemslade Trading Limited*, posjeduje supsidijarna privredna društva na tržištu u Bosni i Hercegovini.

1.1.1. Povezani privredni subjekti DELTA DMD u Bosni i Hercegovini

Privredni subjekt *Hemslade Trading Limited*, (..)* vlasnik privrednog subjekta DELTA DMD, ima supsidijarna društva u Bosne i Hercegovine (Tabela 1.):

Tabela 1.

R.b.	Naziv privrednog subjekta	Vlasnički udio	Djelatnost
1.	DELTA REAL ESTATE d.o.o. Banja Luka	(..)*	Promet nekretnina i trgovina
2.	PREZIDENT NEKRETNINE d.o.o. Sarajevo	(..)*	Promet nekretnina
3.	DELTA MAXI promet robom široke potrošnje d.o.o. Banja Luka	(..)*	Trgovina na malo mješovitom robom, prehrambenim proizvodima, pićem i proizvodima široke potrošnje
4.	DELTA AGRAR d.o.o. Laktaši	(..)*	Spoljnotrgovinski promet i zastupanje, trgovina na veliko
5.	C MARKET a.d. Banja Luka	(..)*	Trgovina na veliko, trgovina malo u nespecijalizovanim prodavnicama pretežno hrane, pića i duvana
6.	Standard d.d. Sarajevo	(..)*	Proizvodnja i prodaja namještaja od punog drveta
7.	Delta-Sport d.o.o. Banja Luka	(..)*	Trgovina na veliko opremom za sport
8.	Yuhor-Kompani d.o.o. Banja Luka	(..)*	Trgovina na veliko mesom i proizvodima od mesa

1.2. Privredni subjekt DARTA TRGOVINA

Trgovačko preduzeće „DARTA TRGOVINA“ d.o.o. Banja Luka, Knjaza Miloša bb, 78000 Banja Luka, registrovano je dana 01.07.1991. godine u sudskom registru Osnovnog suda u Banja Luci, pod registarskim brojem 1-1943-00.

Registrovana djelatnost privrednog subjekta DARTA TRGOVINA je trgovina robom široke potrošnje sa pravom obavljanja spoljnotrgovinskog poslovanja, djelatnost nespecijalizovana trgovina na veliko hranom i pićem i slično.

Privredni subjekt ZEKSTRA GRUPA-ZEKSTRA je (..)* vlasnik privrednog subjekta DARTA TRGOVINA.

DARTA TRGOVINA distribuciju i plasman svojih proizvoda na tržište u Bosni i Hercegovini obavlja preko tri poslovne jedinice koje se nalaze u Banja Luci, Bijeljini i Palama.

1.2.1. Povezani privredni subjekti DARTA TRGOVINA u Bosni i Hercegovini

Privredni subjekt DARTA TRGOVINA ima (..)* vlasničkog udjela u privrednom subjektu Novinsko izdavačko štamparsko preduzeće Oslobođenje a.d. Banja Luka (u daljem tekstu: Oslobođenje a.d. Banja Luka).

1.2.1.1. Privredni subjekt Oslobođenje a.d. Banja Luka

Privredni subjekt Novinsko izdavačko štamparsko preduzeće Oslobođenje a.d. Banja Luka, sa sjedištem na adresi Knjaza Miloša bb, 78000 Banja Luka, registrovan je u sudskom registru Osnovnog suda u Banja Luci dana 25.12.2002. godine, pod brojem 1-15462-00.

Registrovana djelatnost privrednog subjekta Oslobođenja a.d. Banja Luka je novinsko, izdavačka i štamparska djelatnost.

2. Obaveza prijave namjere koncentracije

U smislu člana 14. stav (1) Zakon, obaveza prijave namjere koncentracije privrednih subjekta postoji ako ukupni godišnji prihod učesnika koncentracije, ostvaren prodajom roba i /ili usluga na svjetskom tržištu, iznosi preko 100.000.000,00 KM po završnom računu u godini koja je prethodila koncentraciji i ako je najmanje jedan od učesnika koncentracije registrovan na teritoriji Bosne i Hercegovine.

Na osnovu ostvarenog godišnjeg prihoda učesnika koncentracije na dan 31.12.2007. godine i povezanih privrednih subjekta (Tabela 1.) proizašla je obaveza prijave namjere koncentracije, u smislu člana 14. stav (1) tačka a) Zakona.

Ukupni ostvareni godišnji prihodi učesnika koncentracije na dan 31.12.2007. godine iznose:

Tabela 2.

Konsolidovani prihod	DELTA DMD		DARTA TRGOVINA	NISP OSLOBOĐENJE
	KM	RSD	KM	KM
Svijet	(..)*	(..)*	-	-
BiH	-	-	(..)*	(..)*

Ukupni godišnji prihod privrednog subjekta DELTA DMD ostvaren u 2007. godini na svjetskom tržištu iznosio je (..)* KM, dok na tržištu Bosne i Hercegovine privredni subjekt DELTA DMD nije ostvario prihod.

Privredni subjekt DARTA TRGOVINA ostvario je ukupan prihod u iznosu od (..)* KM po završnom računu u godini koja je prethodila koncentraciji. Privredni subjekt DARTA TRGOVINA je na teritoriji Federacije BiH ostvario 15,65% ukupnog prihoda, ostvarenog prodajom roba i usluga u 2007. godini, a na teritoriji Republike Srpske 84,35%.

Budući da je ispunjen uslov zajedničkog ukupnog godišnjeg prihoda i da je najmanje jedan privredni subjekt učesnik koncentracije registrovan na teritoriji Bosne i Hercegovine, u smislu člana 14. stav (1) Zakona, učesnici koncentracije obavezni su podnijeti Prijavu

3. Pravni okvir ocjene predmetne koncentracije

Konkurencijski vijeće je u provođenju postupka ocjene dopuštenosti koncentracije primjenio odredbe Zakona, Odluke o utvrđivanju relevantnog tržišta („Službeni glasnik BiH“, broj 18/06), te Odluke o načinu podnošenja prijave i kriterijumima za ocjenu koncentracija privrednih subjekata.

4. Pravni osnov predmetne koncentracije

Pravnim osnovom koncentracije smatra se Ugovor o pristupanju novog člana društva zaključen dana 16. jula 2008. godine u Beogradu, Republika Srbija, između privrednog subjekta DELTA DMD d.o.o. Beograd, Žorža Klemanosa 37, 11000 Beograd, Republika Srbija, i privrednog subjekta ZEKSTRA GROUP – ZEKSTRA d.o.o. za proizvodnju i promet robe na veliko i malo, Trg Nikole Pašića 9/III, 11000 Beograd, Republika Srbija.

Predmetnim Ugovorom privredni subjekt DELTA DMD stiće 10,0% udjela u privrednom subjektu DARTA TRGOVINA, a nakon dopuštanja koncentracije od strane Konkurencijskog vijeća privredni subjekt DELTA DMD koristiće *call* opciju s namjerom sticanja većinske kontrole u DARTA TRGOVINA.

Navedenim Ugovorom privredni subjekti DELTA DMD i ZEKSTRA GRUPA-ZEKSTRA saglasili su se da će u roku od 6 (šest) mjeseci od dana zaključenja i ovjere predmetnog

Ugovora koristiti *put*, odnosno *call* opciju (i to ZEKSTRA GRUPA-ZEKSTRA prodajnu opciju, a DELTA DMD kupovnu opciju) sa namjerom sticanja većinske kontrole u privrednom subjektu DARTA TRGOVINA od strane privrednog subjekta DELTA DMD, uz uslov da navedeno sticanje većinske kontrole bude dopušteno od strane Konkurencijskog vijeća BiH.

Pravni oblik koncentracije u skladu s članom 12. stav (1) tačka b) pod 1) predstavlja sticanje kontrole jednog privrednog subjekta nad drugim privrednim subjektom kupovinom većine dionica ili udjela osnovnog kapitala.

5. Relevantno tržište predmetne koncentracije

Relevantno tržište, u smislu člana 3. Zakona, te čl. 4., 5. i 6. Odluke o utvrđivanju relevantnog tržišta, čini tržište određenih proizvoda (usluga) koji su predmet obavljanja djelatnosti na određenom geografskom području.

Prema odredbi člana 4. Odluke o utvrđivanju relevantnog tržišta, relevantno tržište proizvoda obuhvata sve proizvode i/ili usluge koje potrošači smatraju međusobno zamjenjivim s obzirom na njihove bitne karakteristike, kvalitet, namjenu, cijenu ili način upotrebe.

Prema članu 5. Odluke o utvrđivanju relevantnog tržišta relevantno tržište u geografskom smislu obuhvata cijelu ili dio teritorije Bosne i Hercegovine, na kojoj su tržišni konkurenti aktivni u prodaji i/ili kupovini relevantnog proizvoda pod jednakim ili dovoljno ujednačenim uslovima koji to tržište bitno razlikuju od uslova tržišne konkurencije na susjednim geografskim tržištima.

Analizom relevantnog tržišta učesnika koncentracije Konkurencijsko vijeće je utvrdilo da je relevantno tržište proizvoda u predmetnoj koncentraciji tržište trgovine na veliko robom široke potrošnje, kao i tržište izdavačko, novinsko i štamparske djelatnosti.

Relevantnim geografskim tržištem smatra se tržište Bosne i Hercegovine, jer učesnici koncentracije plasiraju relevantan proizvod na cijeloj teritoriji Bosne i Hercegovine.

Slijedom navedenog, relevantnim tržištem predmetne koncentracije smatra se tržište trgovine na veliko robom široke potrošnje, kao i tržište izdavačko, novinsko i štamparske djelatnosti na cijeloj teritoriji Bosne i Hercegovine.

6. Analiza relevantnog tržišta predmetne koncentracije u Bosni i Hercegovini

Prema podacima iz Prijave i podacima prikupljenim od nadležnih institucija Bosne i Hercegovine o relevantnom tržištu (učesnicima koncentracije, konkurentima itd), učesnici koncentracije (i sa njima povezani privredni subjekti - *Yuhor-Kompani* d.o.o. Banja Luka i *DELTA MAXI* d.o.o. Banja Luka) imaju do 1,0% tržišnog udjela na tržištu trgovine na veliko robama široke potrošnje.

Na relevantnom tržištu trgovine na veliko robom široke potrošnje djeluje veliki broj privrednih subjekata sa relativno malim tržišnim udjelom te je prema indeksu koncentrisanosti (CR I *Herfindahl-Hirschman*) ovo tržište slabo koncentrisano – što potvrđuje i CR₇ indeks (7 najjačih privrednih subjekata – konkurenata) koji iznosi oko 25,9%. Međutim, na ovom tržištu prisutan je kontinuiran rast koncentracija u odnosu na 2006. godinu.

Također, na relevantnom tržištu izdavačko, novinsko i štamparske djelatnosti djeluje veliki broj privrednih subjekata sa relativno malim tržišnim udjelom te je ovo tržište slabo koncentrisano. Prema podacima iz Prijave učesnici koncentracije, odnosno sa njima povezani

privredni subjekti imaju neznatan tržišni udio na ovom relevantnom tržištu u Bosni i Hercegovini.

Slijedom navedenog postojanje velikog broja privrednih subjekata sa pojedinačnim relativnom malim tržišnim udjelom na oba relevantna tržišta onemogućava stvaranje i jačanje dominantnog položaja učesnika koncentracije.

Prema navedenim podacima provođenjem predmetne koncentracije neće doći do značajne promjene tržišnog udjela na relevantnim tržištima, budući da su udjeli učesnika koncentracije na relevantnim tržištima relativno niski.

7. Ocjena predmetne koncentracije

Konkurencijsko vijeće analizom podataka i utvrđenih činjenica, u smislu kriterija člana 17. Zakona (posebno strukture relevantnog tržišta, tržišnih udjela učesnika koncentracije i konkurenata), je ocijenilo da provođenje predmetne koncentracije neće narušiti postojeću tržišnu konkurenciju s obzirom da neće doći do značajne promjene tržišnih pozicija na relevantnom tržištu trgovine na veliko robom široke potrošnje i izdavačko, novinsko i štamparske djelatnosti u BiH

Predmetna koncentracija može imati samo pozitivne efekte na relevantnom tržištu Bosne i Hercegovine, jer će se ulaskom privrednog subjekta DELTA DMD na relevantno tržište poboljšati kvalitet relevantnog proizvoda kroz inovacije u distributivne kapacitete privrednog subjekta DARTA TRGOVINA, što će dovesti do poboljšanja kvaliteta relevantnog proizvoda od čega će koristiti imati i krajnji potrošači.

Uzimajući u obzir sve iznesene činjenice i podatke, koji su prethodili donošenju predmetnog Rješenja, Konkurencijsko vijeće je ocijenilo predmetnu koncentraciju dopuštenom, u smislu člana 18. stav (2) tačka a) Zakona, kao što je odlučeno u dispozitivu ovog Rješenja.

8. Novčana kazna

Članom 49. stav (1) tačke a) i c) Zakona propisano je da Konkurencijsko vijeće može izreći privrednim subjektima novčane kazne koje ne prelaze 1,0% (jedan) od ukupnog prihoda u prethodnoj godini poslovanja, ako ne postupe po zahtjevu u smislu čl. 33. i 35. ovog Zakona dostavljajući netačne ili pogrešne informacije ili ne osiguraju potrebne informacije u okviru datog vremenskog roka ili dostave netačne ili pogrešne informacije u postupku ocjene koncentracije u smislu čl. 16., 17. i 18. ovog Zakona.

Konkurencijsko vijeće je utvrdilo da privredni subjekt DELTA DMD pri podnošenju Prijave nije dostavio sva pravna akta koje se odnose na predmetnu koncentraciju, a koja imaju pravna dejstva na namjeravanu koncentraciju u smislu člana 30. stav (1) tačka c) Zakona, te je iste dostavio naknadno na zahtjev Konkurencijskog vijeća.

Privredni subjekt DELTA DMD pri podnošenju Prijave nije dostavio spisak svih povezanih privrednih društava u Bosni i Hercegovini, kao ni podatke o njihovoj prisutnosti na relevantnom tržištu trgovine na veliko robom široke potrošnje, kao i tržištu izdavačko, novinsko i štamparske djelatnosti u BiH, odnosno naveo je da ne posjeduje povezana privredna društva na relevantnom tržištu u BiH.

Slijedom navedenog, Konkurencijsko vijeće je izreklo novčanu kaznu privrednom subjektu DELTA DMD u iznosu od 20.000,00 KM u skladu s članom 49. stav (1) tačke a) i c).

9. Administrativna taksa

Na ovo Rješenje podnosilac Prijave, u skladu s članom 2. tarifni broj 107. stav (1) tačka d) pod 1) Odluke o administrativnim taksama u vezi sa procesnim radnjama pred Konkurencijskim vijećem („Službeni glasnik BiH“, broj 30/06), obavezan je platiti administrativnu taksu u iznosu od 2.500,00 KM u korist Budžeta institucija Bosne i Hercegovine.

10. Pouka o pravnom lijeku

Protiv ovog Rješenja nije dopuštena žalba. Nezadovoljna stranka može pokrenuti upravni spor pred Sudom Bosne i Hercegovine u roku od 30 dana od dana prijema ovog Rješenja, odnosno od dana njegovog objavljivanja.

Predsjednik

Ibrica Lakišić